

## Ora ta Piká pa Bai Iglesia

Pa nos, sakrifisionan ta un sistema religioso straño. Ma promé i durante era di Hesus tabatin sakrifisio di baka, kabritu, karné, para, i asta hariña, fruta, berdura, biña, èts.

Tur sakrifisio mester a tuma lugá na tèmpel na Herusalèm. Tabatin sakrifisio pa diferente motibu i na diferente okashon. Tin ora a sakrifiká un bestia pa motibu di piká. Dia di Yom Kippur, por ehèmpel, e saserdote prinsipal a sakrifiká un toro pa su mes piká i un chubatu pa piká di Israel. Tabatin sakrifisio pa ekspresá gratitut na Dios. Sakrifisionan tambe tabata preskribí pa purifikashon, por ehèmpel despues di duna lus.

Dios a eksigí esaki den era di Tèstament Bieu. E tabata un parti importante di e sistema di adorashon di pueblo di Dios.

Awendia sakrifisio no ta nesesario mas, pasobra Hesus riba krus tabata e sakrifisio ku a kompletá i hasi tur otro sakrifisio innesario. I awendia nos ta bai iglesia, no tèmpel na Herusalèm.

Kòrdando e importansia di sakrifisionan, ripará kiko Hesus tòg a enfatisá. *“Pesei, si bo presentá bo ofrenda na altar, i ayanan bo kòrda ku bo ruman tin algu kontra bo, laga bo ofrenda ayanan dilanti di altar, i bai; rekonsiliá ku bo ruman promé, i despues bin presentá bo ofrenda.”* (Mateo 5:23-24).

Hinka bo mes den sandalia di hende di e era ei. Talbes bo a kana ku bo kabritu un distansia di sinku kilomentor for di bo pueblo pa Herusalèm pa hasi sakrifisio. Na kaminda, e bestia a tranka pisá; mayoria tempu bo mester a rank'é. Ma porfin, bo a yega tèmpel, morto kansá di e kanamentu ma prinsipalmente pa motibu di e trastorno ku e kabritu a hinkábo aden.

Ma durante e seremonia promé ku ta mata i sakrifiká e kabritu, bo ta kòrda ku bo tabatin klèsh ku un bisiaña. El a keda rabiá ku bo. E no ta kumindá bo mas. E teksto aki di Beibel ta bisa bon kla kiko bo mester hasi: *“laga bo ofrenda ayanan dilanti di altar, i bai; rekonsiliá ku bo ruman promé, i despues bin presentá bo ofrenda.”* Bo tin ku kana e sinku kilometer bai kas bèk, drecha bo relashon ku bo bisiaña, anto regresá pa hasi e sakrifisio. Bo viahe di 10 kilometer (ida i buelta) a bira 20.

Klaramente Dios ta pone importansia riba relashonnan inter-personal. **Dios no ta aseptá bo adorashon te ora ku bo ta hasi bon ku e persona ofendé!** No tin nodi di bai sirbishi mes si bo sa ku kos no ta bon entre abo i un otro persona. No tin nodi di hasi orashon si bo sa ku un persona no ta papia ku bo. No tin nodi di tuma Sena di Señor si un kolega, famia, òf bisiaña ni asta ta kumindá bo.

Ma nos ta bon komediante—hipókrita. Nos ta preferá ignorá loke Hesus a bisa, bai sirbishi tòg i pretendé ku tur kos ta bon entre nos i Dios! Nos ta kanta, ta hasi orashon, asta ta duna “Pas” na otro mientras tin guera den nos kurason. **! I henter ora Dios Su dede ta den Su orea! E no ta despuesto pa skucha te ora bo ta rekonsiliá ku e persona ofendé i kunE!**

Hesus a mostra ku bo mester **hasi máksimo esfuerso** pa rekonsiliá ku e persona ofendé. Awendia ta muchu mas fásil pa komuniká ku hende ku den era di Hesus. Komparativamente ta fásil pa dreña outo bai serka e persona. Ta fásil pa primi un par di number na bo telefon i papia ku e persona. **Ma tòg nos ta tarda pa hasi bon ku hende.**

Skritura tambe ta bisa, *“no laga solo baha riba boso rabia”* (Efesionan 4:26). Den otro palabra, hasi bon ku e persona mesun dia ku e ofensa ta sosodé. Ma nos ta ignorá Palabra di Dios tranquil i ta laga simannan, lunanan, i asta añanan pasa sin drecha ku e persona.

Klaramente bo relashonnan inter-personal ta afektá bo relashon ku Dios. Mihó nos iglesianan ta mas bashí...bashí di hende ku no ta despuesto pa rekonsiliá ku nan próhimo ofendé, pasobra **ta piká pa nan bai iglesia!**